

Discours de Gaspar de
Cotign

F

71



Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
Pft 965





Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
Pflr 965





Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
Pflit 965





Early European Books, Copyright © 2011 ProQuest LLC.
Images reproduced by courtesy of Koninklijke Bibliotheek, Den Haag.
Pft 965

















DISCOVERS

DE FEV MESSIRE

GASPAR DE COLLIGNY

AMIRAL DE FRANCE,

sur la guerre de Flandres :


*Comprenant vne descouverte tresmanifeste de
la forge principale de tous les maux de la
Chrestienté: declaration tressage des moyens
à tenir contre ceste forge & boutique de
maux: & prediſtion tresueritable de beau-
coup de choses auenues depuis lors iusques au
temps present.*



A LEYDE,

Chez Antoine Maire.

clō. lō. xcvi.



965

DISCOURS

DE FEV MESSIRE

GASPAR DE COLLIGNY

AMIRAL DE FRANCE

sur la guerre de Flandres :

Comptant une descomente tresnecessaire de
la force principale de tous les rois de la
Christianite: declaration tresse des moyens
a tenir contre cette force & beatique de
mon: & prediction respectable de bon-
coup de choses auant de puis lors
temps present.



A LEVRE

Chez Antoine Main.

cla. la. xvi.

3

*A tresillustre Prince
& Seigneur*
MONSEIGNEVR HENRY
FILS DE MONSEIGNEVR
G V I L L A V M E P R I N C E
d'Oranges, &c. de tresillustre
memoire, Conte de Nassau,
Catzenelbogen, Vianden,
Diest, &c. mon treshonore
Seigneur,

Salut en Iesus Christ.

MONSEIGNEVR, ceux
qui veulent represen-
ter les prouesses &
les faicts louables de
quelques personna-
ges qui sont renom-
mez a cause de leurs vertus & leur au-
torite, ont acoutume de louer la main
des meilleurs peintres & des graveurs

A 2

les

4
les plus exquis dont ils se peuuent auiser, afin que l'artifice de l'ouurier exprime autant que faire se peut l'excel-
lence d'iceux & de leurs faictz Heroi-
ques & signalez: & en somme s'effor-
cent de faire en telle sorte, que chacun
voyant le dehors representé au vif,
confesse qu'il n'y faudroit plus rien
que l'ame, qui y donnast le sentiment,
le mouuement, la parole, & la vie.
Et toutesfois c'est bien autre chose,
quand on nous represente au vif vn
homme vertueux, son entendement,
ses pensees, ses affections, ses conseils,
& ses ceuures, que quand quelque
subtil pinceau ou burin a louage nous
monstre seulement le dehors & les si-
gnes d'iceluy, qui aparoissent & se
voient à l'œil aussi bien des bestes que
des homes, & des lourdauds aussi bien
que des gens entendus. Cettuy là
monstre l'ame, ceux cy ne monstrent
que le corps: cettuy là monstre la ve-
rité

rité, ceux cy n'en monstrent que le si-
gne: cettuy là a vray parler monstre
l'estre & la substance mesmes des cho-
ses, la faisant comme voir a l'œil &
toucher a la main, & ceux cy n'en
donnent que l'ombrage en veue. Mais
quand le mesme personnage a eu ceste
grace de par Dieu, qu'il peut d'une
mesme main faire a son eage services
memorables, & laisser a l'eage qui
vient apres tesmoignages dignes &
louables de soy, de ses conseils, de ses
faicts, prouësses, & vertus: cōbien plus
est vn tel recommandable a la poste-
rité? Car il ayde tout le monde en vn
coup, il instruit les ignorans, il accroist
les fauans, il fortifie les vertueux, il
desfie les ennemis de foy & de vertu,
il rend les ingrats conuincus; brief il
arrache hors de la bouche de tout
le monde peruers vne iuste reconnoi-
sance, quoy que forcée, & vne confes-
sion veritable de sa vertu: & tout ainsi

A 3

qu'il

6
qu'il l'a tesmoignée en son temps par
singuliers seruices, aussi par ses escrits
il en esclaire magnifiquement ceux qui
viennent apres. Tel a esté de nostre
temps ce grand & fidele instrument
de Dieu & de tout le Royaume de
France, feu Messire Gaspar de Col-
ligny, Amiral de France, &c. grand
pere de V. S. duquel la pieté incroya-
ble, la vertu singuliere, la fidelité in-
vincible, la force redoutée, & les ge-
stes memorables ont tellement gagné
mesme sur les ennemis du Royaume
qu'il a fidelement serui, & de la reli-
gion qu'il a constamment inaintenue,
qu'ils sont contrains de luy en donner
le los qu'il en a merité sur tous (sans
blasmer personne) & deuant tous les
personnages qui ont faict seruice au
public de nostre temps. Mais ie ne fa-
uoye pas encores, & n'eusse onques
cuydé que ce grand personnage eust
tracé vne telle Image & remémbran-
ce de

ce de foy meſme, ny laiſſé par eſcrit &
deſcouuert ſi bien le fond de ſes pen-
ſees, le naiſ de ſes diſcours, & la fleur
de ſes conſeils ſalutaires avec ſa propre
main pour le bien de toute la Chre-
ſtienté, & particulièrement du Roy-
aume duquel il eſtoit vn beau & pre-
cieux membre : ſi Dieu depuis quel-
que temps par le moyen de quelque
homme notable, qui l'a reueré en ſa
vie, & depuis ſon deces tient la me-
moire d'iceluy precieufe, ne me l'eult
faict venir en main. C'eſt vraiment
vn eſcrit brief & court en paroles, mais
grand en ſubſtance, plein du ſuc de
verité, plein de nerfs & de vertu, plein
de vie; & repreſentât mieux qu'aucune
peinture ne ſauroit faire, l'ame, le cœur,
les affectionſ, le ſentiment, le mouue-
ment, le parler, & le tout de ce grand
perſonnage. Que l'Eſpagne, que
Romme, que toute l'enuie enſemble
du monde malheureux & ingrat vo-

misse sur la memoire d'iceluy toute
 l'ordure & le venin qu'elle peut des-
 charger, pour obscurcir & amortir le
 lustre & l'immortalité de ses vertus: ce
 seul trait de sa main q son ame inno-
 cete a buriné quelque temps deuant sa
 mort iniuste, & qui lors mesme de sa
 mort fut trouué entre ses papiers, est
 plus q suffisant pour effacer les taches
 que le monde s'est efforcé luy mettre
 sus, & monstrier cōbien vit heureuse-
 ment sa memoire apres sa mort. Or a
 qui pourroye ie mieux adresser ce me-
 morial sacré pour le faire venir en vüe
 de tout le monde, sinon a vous, Mon-
 seig^r qui de par Madame la Princeesse
 vostre mere estes vn surgeon heureux
 de ceste bienheureuse tige? Vous auez
 le pourtrait de son corps: voire (qui plus
 est) vous estes en partie vne branche
 prouignée d'iceluy. Cecy defailloit a V.
 S. que vous eussiez aussi vn pourtrait
 public de son ame & de ses recōmen-
 dables vertus, procedant de sa propre

9
main. C'est ce q̄ Dieu vous presente a
cette heure pour seruir d'une part a luy
& a tout le monde d'un tesmoignage
infallible de son innocence & fidelité
apres son deces a tousiours, & pour
vous estre d'autrepart un patron do-
mestic, une adresse, & un aiguillon a
toute vertu & tout honneur costillier
de vertu. On enseigne communement
les hommes par autorité, par raison, &
par exéples aussi; & prend on de la pe-
ne beaucoup a amasser, qui çà qui là,
de tels enseignemens, pour induire la
ieunesse & l'amener a bien. Icy Mon-
seigneur, vous avez le tout ensemble
en vostre propre maison: & ne pouuez
seulemēt auiser a vostre personne pro-
uenâte d'un tel estoc, q̄ vous n'y voyez
tout en un coup l'autorité religieuse de
vostre grand pere coniointe a celle de
feu Monseig^r le Prince d'Orége vostre
pere de tresheureuse memoire, vous
appellant par tresuiues & solides rai-

A 5

sons

sons, & excitant par son exēple a l'imi-
tation de ses incomparables vertus. Et
pourtant ie ne supplieray pas icy V. S.
prēdre la chose en bōne part, car elle est
à vous, & d'un grand pere dont la me-
moire vous est en singuliere recōman-
dation: mais seulemēt qu'il vous plai-
se prendre ce mien faict de bōne part,
puis que ie suis si hardy de mettre en
lumiere ce qui est vostre, & le vous
presenter en gage de mes treshumbles
& affectionnez seruices: Suppliant
ensemble nostre bon Dieu,

Monseigneur, que vous accroissant
en eage il vous augmente en toute sa-
pience, intelligence, force, & vertu,
pour seruir aussi vn iour heureusemēt
a sa gloire, a l'edification, consolation,
& auancement de son peuple Chre-
stien, & a vostre salut & louange eter-
nelle. De Diepe ce Lundy 1. Ian. 1596.

De V. S.

Le treshumble & affectionné seruiteur
Pierre Vinant.

A V L E C T E V R.



N dit bien vray (Amy Lecteur) que iamais chose n'a tant de grace que celle qui se fait a saison. Pourtant i ay eu crainte de mettre ce discours en lumiere, quand ie consideroye que la saison de beaucoup de choses particulieres est passée qui sont mises en iceluy. Mais d'autre part ie ne say cōment plusieurs choses y comprises m'ont faict sentir, qu'il n'est point du tout hors de saison encores pour le iourd'huy. Car premieremēt les mesmes fers sont maintenant au feu lesquels on aprestoit alors pour faire manger du pain d'angoisse a vn milion d'ames innocentes en la Chrestienté: & ceux qui tournent ces fers au feu se seruent du faux manteau de la religion, pour exposer au Turc & a l'infidele le reste de la Chrestienté, pourueu qu'ils en puissent arracher piece: tant faute de religion les transporte. D'auantage ores que ce mal fust passé,

passé, encores est il saison de faire entendre,
 sentir, & voir a tout le monde, qui est la
 cause, le fondement, le commencement, la
 poursuite, le nourricier de ces maux qui ont
 de si long temps embrasé les pays les plus
 florissans de l'Europe d'une si horrible com-
 bustion, & est en poinct d'en reduire au-
 cuns en cendre: a fin qu'a tout le moins
 l'exemple nous rende sages, & les bons auis
 nous rendent auisez a l'auenir. Au reng
 desquels bons & sages auis i'ose bien har-
 diment mettre ce discours tant brief qu'il
 est: & ne doute point que toute personne
 entendue n'en iuge de mesme que moy, si
 l'on considere bien & sans transport d'af-
 fection, combien viuement & proprement
 sont icy discoursus les conseils sanglans &
 malicieux de l'Espagne, & les remedes sage-
 ment exposez, tels que le temps d'alors pou-
 uoit porter. Mais finalement quand ce di-
 scours ne seruiroit a autre effeet qu'a repre-
 senter le cœur & les conseils de feu Mon-
 seigneur l'Amiral de Chastillon, qui rapor-
 toit

toit tous ses conseils & services au salut de
 la Chrestienté, & particulieremēt du Roy-
 aume où il estoit, & qui d'une vertu di-
 uine mesprisait son particulier pour servir
 au public, & a persisté en ce zele tressainct
 & salutaire iusqu'au dernier soupir de sa
 vie: Vrayement i'estime que c'est un ser-
 uice deu à la memoire d'iceluy de publier ce
 sien discours: qui dement en peu de propos
 tant de faus discours qu'on a semez fausse-
 ment contre luy, & descouure le tort, la
 fraude, la violence, & la tyrannie où elle
 est. Ainsi a il cheminé comme il escrit: ainsi
 a il escrit comme nous le voyons exprimé en
 ce discours. Tout le temps de sa vie en char-
 ges grandes & honorables, il s'est com-
 porté d'une mesme façon. Estant premie-
 rement Colonel de l'Infanterie Françoisse,
 & depuis Amiral de France, il a fait à son
 Roy & à la France des services inestima-
 bles; à l'Espagnol des insupportables de-
 spits; & en somme tout le bien qu'il a peu
 à la Chrestienté: Sage en conseils, serieux
 en afai-

en affaires, graue en discours, hardy en ex-
 ecutions, preux en fait d'armes, seuer en
 discipline militaire, bries en toutes choses
 vray disciple du droict & de vertu. Voila
 pourquoy (amy Le Cœur) i'ay d'autant plus
 volontiers mis ce discours deuant les yeux
 de tout le monde: afin que comme en sa vie
 il a esté constant miroir de vertu, aussi qu'
 apres son deces tu ayes de reste ce discours
 comme un patron assure de ses vertus
 tracé de sa propre main. A Dieu.

DISCOVRS

DISCOURS^{is}
DE MONSIEUR
L'AMIRAL DE CHAS-
tillon, sur la guerre
de Flandres.



CEUX qui font profession de
iuger & prognostiquer par
quelques signes les fins &
periodes d'un Estat, voyans
ces dernieres années le vostre
si miserablement tourmenté de cette mau-
dite hayne, qui iadis emporta plusieurs em-
pires & Monarchies de ce monde, & en-
cores auioordhuy en trauaille vne bonne
partie, ne pouuoient autre chose iuger, si-
non que la contrarieté des humeurs enai-
gries par les longues années, les recheutes
& accès redoublez ne finiroient iamais que
par la fin de vostre pauvre estat: dont la plus-
part l'auoyent abandonné; & ceux qui
mieux esperoyent, craignoyent qu'au moins
il y deust laisser vne partie ou de ses mem-
bres, ou de sa force. Maintenant, Sire,
Dieu comme le seul medecin, qui en cette
maladie

maladie desesperée pouuoit donner remede, fait tant de grace à votre Maiesté, que de le voyr guery, refaict, & remis sur pieds. Reste de le preseruer d'une recheute, & le maintenir par tous moyens en santé, loislables. & à cecy n'est rien plus propre, qu'un exercice pris a temps, qui consume les mauuais humeurs, qui la pourroyent causer, & confirme ce qui entretient la santé: c'est d'entreprendre une guerre dehors pour entretenir la paix dedans; & (comme tous bons Politiques ont de tout temps faict) mettre un ennemy en teste à un peuple aguerri, de peur qu'il ne deuienne ennemy de soy mesme. Chacun fait comme le François malaisement, qui a gousté les armes, les peut laisser, & comme souuent de gayeté de cœur par faute d'ennemy, il querelle son compagnon & amy mesme. l'Italien, l'Alemand, le Suisse, la paix faicte retourne à son mestier; le François desprise tous autres mestiers, & demeure soldat par faute de plus commode exercice; plusieurs aimans mieux ou chercher la guerre au loin, ou la faire aux passans sur les chemins, que de se reposer chez eux.

Pour vuider donc tant de sang corrompu &

pu & superflu, qui pourroit creer quelque nouvelle maladie au corps de votre estat, il faut ou saigner, ou pour le moins esuenter la vene: il faut, di-ie, entreprendre vne guerre: mais il faut qu'elle soit iuste, facile, & vtile, & que le profit n'y soit moins honorable, que l'honneur profitable; & telle, pour le faire court, n'en voy-ie aujourdhuy, que contre le Roy d'Espagne.

Iustement la luy pouuez faire, pour les iniures qu'avez receues de luy en votre bas aage, qui decouurent bien combien il vous est amy. Car non content de vous auoir plus par fraude que par force depossede d'une partie des prouinces hereditaires de voz ayeux, pour vous brauer iusques au nouveau monde, & entre les plus barbares faire apparaitre que pour quelque tort qu'il vous feist n'en faisiez aucun semblant, il a taillé en pieces voz soldats en la Floride, & vous en a chassé hors, lors que les dissensions de votre peuple ne vous donnoient le loisir de vous en resentir.

Des biens il est venu à l'honneur. Il vous a osté la precedence en la Cour de l'Empereur, & eniambé l'egalité en celle de Rome. Qui sont les deux ou chacun a esgard:

B

& brigue

& brigue le mesme non à Romme, mais par tout ou voz Ambassadeurs se sont rencontréz; iusques là que de tout frez à Romme, comme s'il vouloit vous deffier, il a tasché le mesme.

En quoy le Pape s'est montré si semblable à son predecesseur, que contre le droit, duquel de tout temps vous auez esté en possession, il n'a voulu bailler la paix à votre Ambassadeur, pour ne sembler faire tort à l'autre: & est (comme semble) auoir donné vn augure de guerre, vous ayant refusé la paix à tous deux. Comme si le Roy d'Espagne par les cruantez qu'il a exercées contre les Chrestiens, deuoit vous desemparer du titre que voz predecesseurs ont acquis par infinies victoires conquises sur les Turcs. N'agueres voyant votre Maiesté auoir autrefois tenu propos d'acheter le Marquisat de Final, & recompenser le Marquis ailleurs, il l'a enuahy de faict & de force, craignant (comme les chefs de l'entreprise disoyent ouuerrement) que les François ne missent le pied en lieu si important, c'est adire, hief d'Empire & pays d'Italie; En quoy il monstroît qu'il se desfioit de vous, & desfiance est tousiours accom-

compagnée de peu d'amitié. Ce faisant, sa reputation est tellement acree aux despens de la votre, qu'il sembloit presque a toutes prouinces & contrées neutres d'Italie, que vous despendissiez en quelque façon de luy, & que les lys fussent du tout flestris, sans espoir de refleurir iamaïs, iusques là qu'en lieux couuerts, a la grand honte & contrecœur de tous vrais François, on l'appelloit simplement le Roy, comme s'il estoit non seulement le premier, mais seul en la Chrestienté de ce titre. Si l'on me dit qu'il est doublement votre beau frere, doublement vous a il offensé, vous portant si peu de respect: ou pour le moins ne vous est pas bõ frere, qui dresse embusches a voz biens & honneurs. Si l'on m'allegue pour bon office le secours qu'il vous donna en voz guerres Ciuiles, ie demanderay si cettuy la sera estimé bõ amy de quelqu'un, qui le voyant transporté de passion & de colere iusques a se vouloir tuer soymesme, luy baille la dague en la main pour se despescher, & non plustost celuy qui la luy cache & refuse, tant que la colere ait cedé a la raison.

Il n'y a François, s'il n'est transsubstanti-

B 2

tié en

tié en Espagnol, qui ne connoisse bien telle auoir esté son intention. Ce sont vieilles finesses de nourrir la guerre en vn estat voisin, tant que ou la part vincue vous appelle au secours, ou toutes les deux abattues soyent contraintes de vous receuoir.

Il n'attendoit, Sire, que de voir votre sceptre brisé & votre couronne en piéces pour en ramasser les esclatz, & en recueillir les fleurons. Si depuis la paix faicte on eust a l'imitation de Maximilian premier, diligemment escrites & enrollees toutes les occasions qu'il vous a données de la rompre, & les iniures dont il vous a prouoqué a guerre ouuerte, le volume seroit pieca plain. Il me suffit d'en auoir touché quelques vnes. Pour conclure, si les torts receuz, qui rendent la guerre iuste, se laissent en arriere, ou delayent plus long temps, votre action ne pourra auoir lieu, votre droit deuiendra tort, & votre cause legitime semblera pretexte, & le point a l'appetit controuué. Donc l'occasion qui se monstre, vous ne la pouuez laisser, sans y laisser de votre hōneur: vous ne la pouuez delayer, sans perdre le profit de la poursuite. Et si on me dit qu'il faut plus auoir
desgard

d'égat
qu'au
d'hye
ru des
celles
guerre
manter
des, q
pour m
mance
leur re
Maie
uante
tantel
est l'ay
quel
on n'o
partie
differe
il beso
faire
doit c
desiac
qu'il
si vo
sous
pre p

d'esgard au profit general de la Chrestienté
 qu'au votre propre, veu qu'il est aujour-
 dhuy empesché cōtre le Turc. c'est encore
 vn des vieux coups d'escrime de ses an-
 cestres, qui contre tous se sont parez de la
 guerre des infideles, vsans avec ce beau
 manteau de plus d'infidelité enuers les fi-
 deles, que le Turc enuers ceux qu'il tient
 pour infideles. S'il est si zelateur, qu'il com-
 mance a establir les Princes en tout ce qu'il
 leur retient & vsurpe, reestablisant votre
 Maiesté en ses patrimoines, vn Roy de Na-
 uarre en son Royaume. Autrement d'au-
 tant est il plus a hair que le Turc, que plus
 est hayssable le Chien qui mange l'autre,
 que le Loup mesme. Je laisse, qu'onques
 on n'ouit parler, que par proces qu'ait ma
 partie cōtre qui que ce soit, ie soye tenu de
 differer mō action & poursuite. Mais qu'est
 il besoin, ores de disputer, si elle se doit
 faire? Considerons plustost, comme elle se
 doit conduire & entretenir. Vous l'auiez
 desia commencée, Sire: & quelque mine
 qu'il face, autant vous en fait il de gré, que
 si vous auiez mis armées en campagne
 sous voz enseignes, & y eussiez esté en pro-
 pre personne. Quand il voit que votre

Maiesté a receu, honnoré, fauorisé, & gratifié le Conte Ludouic de Nassau de sa cour, & autres Seigneurs & Gentilz-hommes qu'il tient pour rebelles : Quand il fait que vostre Maiesté a communiqué avec le Seigneur de Genlis reuenü de Mons, en esperance de retourner & mener des forces; & choses encores qui passent plus outre: Que peut il autre chose penser, sinon que votre Maiesté luy voudroit nuire, mais qu'elle fait couuertement ce qu'ouuertement n'oseroit?

L'Espagnol, Sire, n'en pense pas moins: autant vous est il ennemy pour luy auoir monstré votre espée, que pour l'en auoir batu: autant pour auoir decouvert des signes de mauuaise volonté, que pour en auoir produict les effectz en temps & lieu: il le vous garde. Mais vostre Maiesté se doit souuenir que le premier coup en vaut deux.

La guerre donc n'est point iuste seulement, mais necessaire, si l'on en veut preuenir vne tresperilleuse: & vous declarant vous ne faites point vn ennemy, mais combattez celluy qui est desia fait. Mais pour ce que maint bon procez se perd quand la

partie

partie est plus forte que le droict, & que le moyen de poursuiure deffaut, ie veux maintenant monstrier que la poursuite vous en est tresfacile; & ce tant par l'augmentation de votre force, depuis la paix faicte avec luy, que diminution de la sienne.

La guerre, Sire, se faict plus par fer que par or, plus par homes que par argent. La force des hommes consiste en ce qui est dedans le pais sous nous, & dehors sous noz alliez: & en toutes les deux vous le passez.

Dedans voz pais, au lieu que iadis le peuple fuyoit les armes, il les fuyt; au lieu qu'il fremissoit, il saute au son du tambour; l'espée du gentilhomme est aiguisee & du bourgeois desfourillee; le soc du laboureur forge en couteau: autant que vostre Maiesté a de bourgades, autant de garnisons de soldats: & non Bisognes, mais tresagueris, ayans plus veu de routes, sieges, escarmouches, prises en vn an des guerres Ciuiles, qu'en dix autres: iusques la que qui obeissoit en voz guerres, commande aux estrangers; & qui estoit Capitaine, a titre de Colonel. Et si l'on me dit que ce n'est rien d'auoir des soldatz qui ne les a obeis-

B 4

sans,

sans, & que les factions non du tout amorties y mettent la desobeissance: ie respon, qu'entre les homes particuliers & simples soldatz ny a point de faction: que s'il y en a, elles restent entre les chefs, & les oublieront a votre parole, voire mesmes a l'obiect de l'ennemy: ou l'un mettra le bout du pied, l'autre y mettra le talon; comme l'on a veu a la reprise du Haure. Lors votre Maiesté verra, quel avantage a celuy qui se sert des siens, sur celuy qui se sert d'estrangers. Le suiect sert & obeit comme filz: l'estranger comme seruiteur: le suiect sert pour sa vie & pour son honneur, avec expectation de ses seruices, estant a la veue de son Maistre & Prince, pour se voir de luy recompenser ou chastier: l'estranger sert seulement pour acquerir des biens; s'il ne vous couste rien, il n'obeit qu'a demy: & ores qu'il soit de votre solde, on n'en iouit qu'avec coups & consentement des parties: l'or l'atire, & le fer le repousse: l'or l'atire, & la peur de la mort l'en retire; & comme chascun laisse les biens pour la vie, souuent pour ne se hazarder, l'estranger laisse le butin, qui seul l'inuite a combattre. Je laisse que les estrangers ne sont tousiours suppor-

tez

tez en vn Royaume; & que le degast en est plus grand: & tant que le citoyen espargne le sang de son concitoyen; l'estranger espargne le sang de son ennemy, plus que du paisan, quoy qu'amy & confederé qu'il soit. Dont ie laisse a penser a celuy qui a veu la France non aguerrie, quand la Noblesse fait teste a l'Italien, Espagnol, Allemand, & Angloys, & les Reistres liez ensemble, ce qu'elle feroit aujourd'hui, que toute qualite de gens, tout aage, & a peine tout sexe est accoustumé & experimenté aux armes.

Or les estatz du Roy d'Espagne, ne sont pas pour le iourd'hui ainsi. Car outre que l'Espagne n'est si peuplée que la France, les gentils-hommes de toute ancienneté traittent selon le contract qu'ils ont avec le Roy, n'estans tenus que de defendre le pais contre qui l'assailleroit, & ne passent trop volontiers les monts Pyrenées: comme ainsi soit que votre Noblesse va chercher la guerre ou elle est, fust ce en la mer glaciale, ou la Zone torride. Au plus grand camp que iamais l'Empereur Charles ayt faict, ne se trouuerent encores plus de 7000 hommes de pied Espagnols ensemble, &

B 5

quelque

quelque sept ou huit cens chevaux legers. S'il s'en tire des nouueaux, ce seront bisognes, tels que le Duc de Medina Cæli a amenez demy deffaietz de la mer en Flandres.

Cependant il faut que l'Espagne fournisse a tout; car estant la coutume de l'Espagnol de reduire les pais en prouinces; & pour la deffiance & besoin qu'il en a, tenir par tout citadelles & garnisons contre ses subiectz: il faut qu'il en enuoye au Royaume de Naples, Sicile, Nauarre, & Barbarie, es Pais bas, & a Milan: il en faut maintenant vn bon nombre contre le Turc, & tous les ans pour les Indes: dont elle demeure en tout bien depeuplee. Les Royaumes de Naples, Sicile, & l'estat de Milan ont affaire a fournir l'armée contre le Turc: & Sicile, pour estre Isle pres de Naples, a besoin de grandes garnisons, comme plusieurs autres lieux. Et si l'on me dit, q pour la victoire de l'an passé il n'ait que craindre de ce costé la: vn petit coup desfrober n'a pas mis vn si fort ennemy en terre, qu'il ne se puisse incontinent releuer: Il nous apreste la mort, cependant que nous triomphons de la sienne.

Onques

Onques ne se vit grand Empire qui n'ait
 vengé sa perte au premier iour, pour main-
 tenir son peuple en l'obeissance craintive,
 & l'ennemy en peur. Et outre ce en la
 guerre commandée, pour vn soldat ou Ca-
 pitaine qu'il a perdu, les Chrestiens en ont
 perdu deux. l'Isle de Cypre conquise sans
 espoir de la luy arracher, suffit bien pour
 payer les fraiz des Galeres, & les instrumens
 du nauigage qu'il a perduz: Ioint que quād
 il se voudroit reposer, la ligue contraindrait
 le Roy d'Espagne de poursuiure sa victoire,
 & apres auoir vinctu, d'vser de la victoire.
 Du pais bas, qui iadis nous a donné plus de
 travaux que toute l'Espagne, il peult atten-
 dre plus de domage que de profit. Car
 outre ce qu'il a perdu le cœur & du peuple
 & de la Noblesse, qui est en bon François
 plus qu'auoir a demy perdu le pais, vne
 bonne partie des gentils hommes est exe-
 cutée ou bannie: les ordōnances qui mon-
 toient a trois mille cheuaux ou 600 lances
 a cinq cheuaux pour lance, sous la charge
 de cent Capitaines, n'en fourniroyent pas
 mil auourd'hui. Car pour n'auoir esté
 payés de trois ans entiers, la pluspart sont
 sans cheuaux & armes, & le pais mal four-
 ni de

ni de cheuaux faicts. Bref plusieurs pour
fuir la sedition, sont allez passer leur temps
en diuers lieux, comme es cours de l'Em-
pereur, & d'Italie.

D'Infanterie il n'en sauroit trop auoir.
Car outre ce qu'il a xxviij. places ou il tient
garnisons ordinaires, sur les confins de vo-
tre Maïesté, il a tant de bonnes villes, dont
il craint la reuolte, qu'il ne les peu pas four-
nir a demy.

Des Indes, i'ose dire sans crainte d'y pas-
ser mesure, qu'elles sont la foiblesse d'ice-
luy. Car estant que quiaquier pais & non
force, il se ruine, d'autant que ce pais aquis
ne luy donne point d'hommes, ains faut
que l'Espagne s'en depeuple pour l'enpeu-
pler: Tellement qu'il luy en auient comme
a ceux qui aquierent par quelque faueur
vn honneur qui requiert despense, & ne
donne point le moyen d'en faire; Qu'apres
mainti calcul de l'aubert, sont contraincts
de faire banqueroute. Si l'on me dit qu'il
est armé par mer, & que vostre Maïesté ne
l'est, & que les Gaules en sont ademy en-
uironnés, ie l'acorde. Mais il ne vous peut
nuire sur la coste de la grand mer: Car il
n'y a que galeres sur la mer de Leuant. La
coste

coste de Languedoc est forte aisée: celle de Prouée bien que nō fortifiée par tout, bien est elle fortifiable a peu de fraix: s'il met pied a terre, le pais est par nature & par exercice aguerri pour les rembarer: comme il s'est veu a Marseilles, ou Charles le quint s'ahurta deux fois en vain. Puis courant noz costes, il se deslie d'avec les Venitiens, avec lesquels il est ligué contre le Turc: qui luy est besongne sur les bras qui l'empesche assez. Voyla quant aux forces interieures. Il est affoibli, & vous grandement renforcé.

Venons maintenant a celles de dehors, qui consistent en ce qu'on peut esperer des alliez & confederez.

Icy faut il considerer, que depuis que la France desmembrée par partage est rassemblée sous vn Prince, iamais l'Espagne seule, quoy qu'elle ayt esté reünie de mesme, ne la osé attaquer; mais ce qu'en auons eu de dommage, a esté par les forces d'Allemagne haute & basse, ou d'Italie réunies toutes ou partie d'icelles sous l'Empereur Charles & le Roy Philippe son filz, avec l'alliance de l'Anglois qui ne nuisoit guerres moins, & souuent l'autorité du Pape.

Telle-

Tellement tout calculé, qu'onques ne perdismes bataille où l'Espagnol fist le quart de l'armée ennemie. si par force ne vous vinquoit, moins par son astuce; qui se peut comprendre en vn mot, de ne dire iamais ce qu'il fera, & ne faire iamais ce qu'il dit: ains plustost nous a tourmentez par l'astuce des malcontents & subornez, qui se retiroient vers luy, que par force & finesse subtile qui fust en luy. Ores ne sommes nous pas ainsi. L'Anglois requis, iadis espousoit la querelle de tous noz voisins cōtre nous a telle quelle defense: l'Anglois a aujourd'hui ligue defensiue avec nous, laquelle se pourra rēdre offensiue en prouuant comme il a esté le premier offensé. Ioinct que pour l'enuie qu'il a de Zelande, pour les Anglois nouuellement descenduz a Flessingue, & pour les hostilitēz passées entre eux, il y pourra aisement condescendre.

*Le nom a
esté laissé
en blanc.*

L'Escosse ne nous doit pas nuire pour la tresanciēne ligue qu'elle a avec notre nation; & ne le voudroit, pour la haine de l'inquisition d'Espagne: & ne pourroit outre sa foiblesse ordinaire, pour les factions du Roy de la ^{*} & des Hamiltons briguans

briguans le gouvernement estrange, qui
s'entretrauaillet assez eux mesmes. L'Alle-
magne qui le temps passé nous battoit,
nous preste aujourdhuy la main, & nous
presente vne ligue, qui osted'vn costé les
forces a l'Espagnol, & de l'autre double les
notres. L'Empereur, qui est chef de cest
Empire, & pour estre beau pere de tous
deux, se pourra en cest endroit monst-
neutral; & s'il se formalize pour le Roy
d'Espagne (ou pour ce qu'il est son beau
frere, beau pere, & cousin germain, ou par
la succession dont par la naissance de Dom
Ferdinand il est ioinct) ce sera avec peu
d'effect, ayant le Turc voisin en Hongrie,
qui durant les treues pour ses continuel-
les courses luy fait peur; & apres la fin,
qui n'est trop loin, luy fera la guerre tout a
bon escient.

Les Ecclesiastiques, partie pour la pau-
reté ne luy peuuent donner aucun se-
cours; partie pour la hayne qu'ils ont a
l'Espagnol; & ceux qui ont plus de pou-
voir & de vouloir, pour estre voz voisins
& limitrofes, de peur d'estre comme entre
deux fers enferrez entre votre Maiesté,
& les Protestans, n'oseroyent s'esbranler:

& en-

mesme en
la copie ori-
ginale, pour
ce qu'on n'a
pas trouué
bon de de-
nommer ceste
maison :
pourant
aussi ie me
suis contenté
de laisser
en blanc
tout de
m s'me, sans
y rien met-
tre de mon
avis.

& encores que qui a de l'argent, semble en pouuoir tirer des hōmes, si est ce q' ou peu ou tard en tireroit l'Espagnol, si les Princes Protestants le vouloyent empescher de tout leur pouuoir & autorité; qu'ils employeront tresvolontiers a la ruine du Roy d'Espagne leur capital ennemy, s'ils se voyent bien conioincts avec votre Maiesté.

Les Grisons & les Suisses des sept Cantons sont tousiours a votre deuotion; & les autres, qu'ils prisent plus que tous autres en guerre, ne veulent (cōme ils parlent) vendre leur sang: lequel ils donneront librement en cette occasion, dont depend en partie le repos de leur estat.

En Italie le Pape est ligué avec l'Espagnol: mais estans auiourdhuy ses canons pour la plus part encloués, & ses forces engagées en la Guerre du Turc (qui est vn ennemy contre qui le plus grand de la Chrestienté auroit bien a faire de ses deux mains) il ne vous sauroit en quoy nuire. l'aiouteray, que l'office du Pape semble estre plus fort de se mettre entre deux combatans, que de se renger avec l'vn d'eux; si au grand dommage de la Chrestiente chacun ne voyoit le contraire.

Les

Les Venitiens pour les mesmes empeschemens ne vous peuuent rien faire; & ioinct la ligue qu'ils ont avec votre Maieſté se môſtreroient neutres; & a fin qu'ilz ne se glorifient point de la touche qu'ils dōnerent l'an paſſé au Turc (outre meſme que leur ſeigneurie eſt en tel eſtat par cette ligue, que victorieuſe ou vaincue, elle ſ'abaiſſe tous les ans d'un quart) ils viuent & ſe maintiennent par le Trafic: le Trafic eſt en Leuant, ou Ponant, ou en l'Allemagne. du Leuant pour cauſe de la guerre ils n'aportent rien; & pourtant n'ont que porter en Ponant: tellemēt que d'une meſme barriere les deux portes ſont fermées. Ainſi la guerre deſire grands frais: les frais ſe font par le trafic: & la guerre l'empeschant, n'y a moyen de la maintenir longuement.

Maintenant Dom Ian d'Auſtriche, ou pour le ſoupçon qu'il a de votre Maieſté, ou pour l'eſperance de quelque bon ſucces en Barbarie, ne veut aller en Leuant. En ce cas il rompt la ligue, que le Roy d'Eſpagne a avecque les Venitiens: dont ſera bien aiſé a faire la paix avec leſdits Venitiens mymattez, qui ne peuuent a la longue attendre de la guerre que la ruine de leur eſtat

C

& du

& du particulier, & faire tomber tout l'orage sur les terres de l'Espagnol.

Tous les Potentats d'Italie pour vne mutuelle haine ou enuie viuent en perpetuelle deffiance: contribuent si peu qu'ils ont de trop contre le Turc: & encores qu'aucuns soyent comme tributaires du Roy d'Espagne, ou pour mieux dire a ses gaiges; ie ne say s'ilz le desirent voir si grand: & ores qu'ainsi fust, les Italiens ne s'entrebattent volontiers a qui premier passera les Alpes.

Le Duc de Sauoye est par le traicté de paix & par la nature de son estat enfermé de tous costez, neutre: & quand il voudroit estre de la partie, seroit plus enclin a vostre Maiesté qu'au Roy d'Espagne, partie pour l'alliance, & partie pour la Duché de Milan, qui est trop forte & trop proche.

Le Duc de Ferrare est François: Le Duc de Florence ne cherchera point a vous nuire, de peur qu'on ne luy demande les Siennois. Votre Maiesté a le Duc de Neuers, pour le regard duquel elle pourroit beaucoup enuers le Duc de Mantoue. Le Duc d'Vrbain, n'a rien de trop: dont tout bien recherché se peut voir, que l'Italie en general ou ne pourra, ou ne voudra aucunement

vous

vous nuire. Bref de ces Prouinces qui furent iadis contre nous coniurées, Allemagne, Italie, Angleterre, & l'Espagne; les deux, l'Allemand & l'Anglois, seront pour votre Maiesté, l'Italie, neutre: ou si elle se formalize, peu nuisible. L'Espagne de foy mal peuplée: & par le peuplement des Indes, garnisons lointaines, & guerres du Turc, despeuplée des hommes & de soldatz, restera seule a combattre.

Voyla quant aux prouisions de fer que l'un & l'autre peut attendre. Quant a l'or & finances: Le Roy d'Espagne, apres la paix faicte avec les aides de Flandres, contribution d'Allemagne sous l'Empereur, & exactions d'Italie, se trouuera en fin de conte autant endebté que du temps du feu Roy Henry. Il trouua moyen de payer ses creditiers d'Italie en titres & honneurs faute d'argent, leur donnant des villages es Roiaumes de Naples & Sicile nouuellemét erigez en contez, pour satisfaire a leurs contes: a ses creditiers d'Allemagne, il fit banqueroute sous pretexte de la religion, & en fit brusler quelques vns au temps des Foueres en Espagne par l'Inquisition, qui n'auoyent autre plus grand erreur ny he-

refie que de luy auoir preste 7 0 0 0 0 0.
escuz.

Si votre Maieſté n'a en ceſte façon vou-
lu ſatisfaire aux ſiens, entre tant de perſon-
nes il n'eſt pas vn des moindres, que les
ſergentz ne leur mettent iamais la main ſur
le collet, & les crediturs les attendent tant
qu'ils veulent. Votre Maieſté doit a ſes ſu-
iects, & voz ſuieſts vous pensent deuoir
tout: elle doit aux eſtrangers, qui ne pre-
ſtent que ſur bons gages: voz ſuieſts en cet-
te guerre mettront tout ce qu'ils ont, tant
en general qu'en particulier.

Les Eſpagnols ne s'endommageroyent
pas d'un Maraueſdi plus que de coutume:
Juſques là que longuement il s'eſt entrete-
nu des dons de Flandres, qui ſont par cette
guerre du tout entreclos. Ses minieres des
Indes ſont fort eſpuifées, ſi qu'au lieu de
raporter, il faudra bien toſt qu'on y porte:
Les votres qui cōſiſtent en vne perpetuelle
amitié de voz ſubieſts enuers votre Maie-
ſté, ne peuuent iamais tarir. Il luy faudra de-
ſpendre contre le Turc, contre les Barba-
res, contre le Prince d'Orange, & contre
votre Maieſté. Vous n'avez que luy, contre
qui la Nobleſſe deſire tant cette guerre, que
votre

votre Cauallerie ne vous coustera comme
 rien. Restera l'Infanterie a payer, qui ne
 vous montera guerres plus que d'ordinaire,
 tant parce qu'en temps de paix, il vous en
 faut vn grand nombre; & reduisant la guer-
 re comme il faudra au pais de l'ennemy, la
 guerre mesme fournira le reste, & payera a
 demy les soldatz. Je laisse que les Ecclesia-
 stiques ne vouldroyent pas estre moins vo-
 lontaires enuers votre Maieste, qu'enuers
 voz predecesseurs: qui au besoin aucune-
 fois ont pris la moitie, voire presque tous
 leurs reuenuz, & les fonds mesmes. Je ne
 toucheray point aussi aux annates, & au-
 tres droits suffisans de payer ce qui sera ex-
 traordinaire en cette guerre. Si l'on me dit,
 que le Roy d'Espagne ayt moyen d'em-
 prunter la bourse d'Anuers, qui est tout son
 principal fondement; elle ne luy aydera pas
 beaucoup. Car par les ports de mer que
 tiennent les Gueux, le trafic est nul, & par
 consequent la bourse bien mal garnie: Les
 Marchans ont tant presté qu'ils en sont las;
 & si peu qui leur en reste; pour la haine
 qu'ils portent a sa façon de gouverner, il
 n'est gueres a son commandement. Et la
 ville d'Anuers est tellement en debte,

C 3

qu'elle

qu'elle ne s'aquitteroit point pour deux millions d'or, tant qu'il faut qu'elle emprunte a dix & douze pour cent.

Les Geneuois depuis la prise de Final, qui leur importe de 60000 liures tous les ans de perte, ne sont plus si affectionnez a luy: d'ailleurs ne peut il esperer. Et partant votre Maiesté plus forte que luy en gens de guerre & egale en finance, n'y a doute que la guerre ne vous soit tresfacile a entretenir. Or nous pouuons donc iustement & facilement faire la guerre a l'Espagnol. Mais où?

Premierement ne la faut faire qu'en vn lieu. Car pour auoir embrassé la guerre en plusieurs lieux tout en vn temps, nous auons ruiné toutes noz entreprises: & n'y a meilleur que faire a la Romaine ou Turquesque, & mettre toutes ses forces d'un costé, de peur que mangeans trop ne digérons mal, & ne soyons contraincts de reuomir. Et ce lieu ne doit point estre l'Espagne; Car c'est vn pais montueux & auantageux pour le tenant, & ou la Noblesse est forcée de se defendre, qui autrement ne bougera.

Pour l'Italie il faut passer les Alpes: &
chacun

chacun scait que quoy que le pais ait esté engraisié de nostre sang, Il est d'humeur que iamais les lys n'y ont peu bien florir. Il faut, Sire, entreprendre sur le Pais bas, ou le peuple vous appelle, ou l'occasion vous inuite, ou la diuision vous ouure les portes de villes, & vous fait breche raisonnable pour donner l'assaut a tout le pais.

Iustement irez vous pour les iustes pre-tentions sur Flandres, Artois, & Hainaut, ausquels la seule aduersité a fait renoncer a voz predecesseurs: & en viendrez facilement a bout, ayant l'ennemy loin & distrait ailleurs, & vos forces, & de voz al-liez tout a l'entour.

Pour ce faire votre Maieité pourra trai-cter accord avec le Prince d'Oranges: qui tant par vne bonne & forte armée qu'il a au pais, que par les cœurs du Peuple en-clins a luy, comme liberateur, vous y pour-ra beaucoup seruir, & sans doute ne de-mandera pas mieux: considéré qu'ores qu'il prospere a son gré dedans le pais, iuf-ques a le mettre entre ses mains; il ne se peut maintenir que par vne alliance & faueur.

Et apres, faire la guerre comme amy du

pais, & ennemy des ennemis du pais, ven-
 geur de la tyrannie, & restituteur de la li-
 berté. Car pour bien conquerir faut com-
 mencer par la conqueste des cœurs, & le
 reste vient apres tout a son aise. Et pource
 qu'il sera besoin d'entretenir, cōme es pre-
 mieres guerres de Piedmont, vne feuer
 discipline, & par consequent bien payer le
 soldat, a fin qu'estant payé il ne pille, & s'il
 faut, n'ait dequoy se plaindre d'estre puny:
 mettre vne bonne & suffisante armée tout
 a vn coup, pour faire grosse guerre & cour-
 te, & non de petits camps comme iadis.
 Car si elle dure, le trafic faut, & le pais se
 ruine, & le peuple s'attiedit & se reuolte:
 assaillir le cœur du pais & non les frontie-
 res; qui est la vieille escrime, dont les coups
 ne portent que sur les bras & sur les iam-
 bes. Car ainsi coupez vous la racine des
 nerfs, desquelz depēd tout le mouuement.
 Il faut laisser les villes, sans attaquer, & n'y
 aura danger qu'elles couppent les viures.
 Car vous sentans suffisamment fort pour
 les deliurer, elles ne voudront le faire, &
 ores qu'elles le voudroyent, ne pourront,
 partie pour estre petites places capables de
 peu de gens, & partie pour la mer, qui vous
 en don-

en donnera assez, laquelle vous seroit ou-
uerte par tout.

Deffier le chief du pais en bataille, par le
siege de quelque ville capitale riche, & foi-
ble, comme Bruges, & s'il fuit le choq, il
ne fuit la perte : Car la prenant d'assaut, ou
par composition, vous y gagnerez beau-
coup d'autorité, & il perd toute la sienne :
& s'il se veut hazarder, il hazarde tout son
succes, & le ioue en vn coup de dé. Apres
l'auoir prise, pour inuiter les autres, rendre
la liberté, restituer les immunités, augmen-
ter les priuileges, diminuer les exactions. si
par assaut, monstrier exemple de rigueur, en
la personne non du peuple, mais de quel-
ques chefs hayiz du peuple mesme. Ne fa-
hurter en vne petite place forte, ou le gain
est petit, & la perte trop grande, quand ne
seroit que du temps ; mais en lieu dont la
surprise acquiert reputation par tout le
pais. Et ce faisant, les murailles tomberont
en votre main d'elles mesmes, & les portes
s'ouuriront sans y mettre la clef. L'ayant
acquis, votre Maiesté le pourra facilement
garder, non par garnisons, ne par citadelles,
ayant l'ennemy si loin, mais comme vray
Prince, par les raser plustost, & les mettre

es mains des villes. Et ainsi seront les murailles gardées par les hommes, qu'aurez premierement acquis par votre liberalité & debonaireté; & non les hommes asservis & captifs par rempars de murailles, basties pour les emprisonner.

Ora pourfuyure ce proces, les despens ne passeront point le Principal. Car s'il y a de l'honneur, vostre Maicsté y aura du proffit encores plus. Vous mettrez votre ennemy loin, & luy osteriez le moyen de regarder sur votre court. Vous euiterez la despense des garnisons, ayant pour frontiere ou liziere le Brabant, ou (si les Brabans vous eslisent) la Meuze bien remparée ou remparable de tous costéz. Et leurs Priuileges veullent, qu'au cas qu'aucun d'iceux soyt rompu, ils soyent absous du serment presté a leur Prince, & en liberté de se donner a qui eux veullent.

Et plus commode Prince ne peuuent auoir, qu'un Roy de France, pour la raison qu'il n'est ores besoin de discourir. Vous acquerriez un pais, auquel n'avez prouince qui se puisse comparer en grandeur, beauté, richesses, peuple, villes, & commoditez tant de mer, que de terre, & dont sans
fouler

fouler personne vous pouuez chaeun an tirer vn million d'or.

L'Allemand vous redoutera si puissant voisin: l'Anglois vous reuerera, ne pouuant cōmodement se passer du cōmerce d'auec le Pais bas. Autant en fera le Dannois, & le Suede. votre peuples'en enrichira. pareillement l'Espagnol, comme estant loin de terre, sans esperance de reuenir, & forclos de mer, il y aura perdu le plus beau fleuron de sa Couronne, & le credit & l'autorité, que par plustost sembler qu'estre puissant, il a acquis par toute la Chrestienté.

Au contraire, si votre Maiesté ne commence tost la guerre ouuertement, il la commencera quand l'occasion desdaignée par vostre Maiesté se presentera a luy; quand il sera desfaiet & deliuré, comme pourra estre, des empeschemens que le Prince d'Orange luy donne: & attendra en dissimulant l'occasion de faire guerre, qu'en dissimulant vous laissez du tout eschapper.

F I N.

Les personnes vous donnez chacun un ti-
tre un million d'or.

L'Alcayde vous redonne le puillan-
teur. L'Anglois vous reconnoit ne pouvant
contredire le passé du comte d'Ance
le Pas. Avant en sera le Danois, &
le Suédois. Votre peuple, en enrichira par-
ticulier l'Espagnol, comme étant le
sans espérance de revenir, & forlos
de mort, il y aura perdu le plus beau fleuron
de la Couronne, & le credit & l'autorité,
que par plusieurs lemples du este puillan-
teur par tous les Chrétiens.

Au contraire, si votre Majesté ne com-
mencez pas la guerre ouvertement, il la
commencera quand l'occasion s'en pré-
sentera par votre Majesté le présent. L'ay-
ant son destin & de luy, comme
pour estre, des choses qui ne le
font d'Orange luy donne: & attendra
en attendant l'occasion de faire guer-
re, qu'en attendant vous sachiez du tout
le secret.

F. I. N.

